

Door cu e ta siguiendo tratamento na Curacao

Caso penal contra Parlamentario Wever posponi

ORANJESTAD – Manera redactor di casonan di Corte a publica, ayera mainta a tuma lugar e caso penal cu Ministerio Publico a cuminsa contra Parlamentario Candelario Wever. E ta wordo acusa cu diferente biaha na December 2007 a tacha nomber di Rudy Lampe door di yam’e pedofile. Abogado mr. Flanegin di Rudy Lampe a presenta hunto cu Rudy Lampe. Abogado mr. Ruiz a defende señor Wever. Ta asina cu Wever mes no a presenta.

PARLAMENTARIO MALO NA CURACAO

Abogado mr. Ruiz a bisa cu Wever no a haya nada y e mes no a haya nada. Ta den Bon Dia Aruba el a lesa esaki. E no a prepara pa e caso. Hues a bisa cu e caso a keda prepara 7 October y manda. Segun abogado, su cliente no a ricibi e citacion. Su cliente ta actualmente na Curacao pa tratamento di radiacion pa cancer. Mr. Ruiz a remarca cu e no ta abogado di e caso penal. El a representa Wever den cantidad di casonan pero no den e caso penal. El a dicidi di presenta pa no persigui señor Wever sin cu el a wordo asisti. El a pidi pa pospone tratamento di e caso.

CASO POSPONI

Fiscal ta haya importante cu Wever ta presente. Hues a puntra abogado mr. Flanegin kico e ta pensa. Mr. Flanegin, despues di a consulta cu señor Rudy Lampe a bisa Hues cu e no tin nada contra e posponemento di e caso pero no kier pa esaki bay tarda hopi mas. Fiscal a remarca cu e proximo occasion lo ta otro año. Hues a bisa cu no mester especificamente riba un dia

di caso penal. Abogado mr. Ruiz a splica cu actualmente Wever ta na Curacao y pa e

proximo 4 simannan e lo ta na Curacao. E ta dispuesto pa papia cu señor Wever pa

mira si e por bin. Hues a bisa cu e lo aprecia cu Wever por ta presente pa e caso.

Hues a palabra cu Diamars 30 November pa 9’or di mainta lo trata e caso.